

關愛的故事



自強不息好媽媽

我叫阿玲，2000年嚟香港定居天水圍，嗰時我42歲，一心打算同丈夫一齊捱，於是喺一家豆腐店做店員。做咗半年，兩個仔亦都批咗落嚟香港，我被迫放棄份工，喺屋企照顧細路。當時我老公有一份相當穩定嘅工作，勉強維持到一家四口嘅基本生活。但係好景不常，我老公2004年因為肝癌去世，經濟突然無咗依靠，我一時間好難接受。好在有社工姑娘嘅支持同鼓勵，佢仲幫我申請綜援，解決燃眉之急。

要領取綜援，其實我嗰心好唔好受，自己有氣有力，好想靠自己雙手賺錢養家，但係我嘅學歷又唔高，工作經驗又唔多，加上又要照顧兩個仔，搵工真係唔易。我足足搵咗四年都搵唔到。

今年四月，我嘅細路已經十幾歲，我應社署嘅要求參加「欣曉計劃」，由社工幫我搵工。初時我都好抗拒，但係經過社工嘅細心講解同鼓勵，我決定破釜沈舟，再接再厲。終於，俾我搵到份兼職嘅清潔工，每個月工作八日，每日工作九個鐘，薪金大約有二千幾蚊。點知返工唔夠一個禮拜，就已經要睇醫生，仲話我患咗坐骨神經痛同脊椎關節炎。

咁難先至搵到份工，我真係唔想咁易放棄，唯有咬緊牙關，每日食咗止痛藥先至返工。返咗一個月，我忍唔住同老細講，希望將工時減到每日七個鐘，佢話咁都得，不過要將返工日數由八日改為十二日，但係人工唔變，咁咪即係變相減薪？

明知佢搵笨，我都要做，鬼叫而家經濟開始變差，我真係唔想無咗份工。兩個仔見我咁搏命為頭家，都好乖，俾心機讀書，仲應承我唔會學壞，等我安心做工。而家佢兩個喺區內嘅一級中學就讀，成績都幾好，我呢個單親媽媽捱都捱得心甘命抵，希望第日佢兩個有出頭嘅一日！

(637字)